

NATOren eginkizuna sendotu nahi du Frantziak Erromako gailurrean

Frantziarrek ez dituzte nahi Eki Europako herrialdeak Batasunaren barne

Europako Armadaren proiektua proposatu arren, Frantziak ezinbestekotzat ikusten du NATOren iraupena. Gaur Erroman hasiko den NATOren gailurra dela zio, Frantziako Gobernuak bloke militarra osatzen duten hamasei herrialdeen arteko harremanak sendotzearen beharra azpimarratu zuen, NATOren iraupena zalantzan jartzen zuten iritziak ixilaraziz.

PARIS

Erromako gailurak NATO osatzen duten herrialdeen arteko lotura militarra sendotzea nahi du Frantziak. Eki Europako «etsai komunista» desagertu ondoren, NATOren eginkizuna zalantzan geratu da, baina bere partaideek aldaketak beharrezkoak direla onartu arren, Batasun Atlantikoak irautea nahi dute munduko beste herrialdeekiko duten nagusitasuna —ekonomiko eta militarra— beharrezkoa dutelako.

Jean Musitelli Lehendakartzako bozeramaleak Frantziak NATOren etorkizunari buruz iritzi duena adierazi zuen atzo prentsaurrekoan. Musitellik esan zuenez, «Erromako bilerak Atlantikoko bi kostaldeek duen indarra sendotzeko balio behar



Frantziako Armada NATOkoko egitura militarretik kanpo dago.

AP

du eta azken urteotako aldaketa politikoei ekarritakoari egokitzeko gai garena erakutsi behar dugu».

Varsoviako Hitzarmena osatzen zuten herrialdeekiko harremanak sendotu nahi ditu Frantziak, baina NATOren barnean sartzeko goizegi dela uste dio Mitterranden Gobernuak. «Ekialdeko herriei ezin zaie NATOren barne sartuko direnaren ziurtasunik eman, Europako Segur-

✓ Varsoviako Hitzarmena osatzen zuten herrialdeekiko harremanak sendotu nahi ditu Frantziak, baina NATOren barnean sartzeko goizegi dela uste du.

tasun eta Kooperazio Kontseilua eta MEB bezalako instituzioen eginkizuna kontutan hartu behar direlako» adierazi zuen Musitellik.

NATOren eginkizuna indartu nahi duen arren, Frantziak betidanik amerikarekiko bestelako politika eraman duela erakutsi nahi izan du. Hori dela eta, Charles de Gaullek 1966an NATOren agintaritzatza militar bateratutik ateratzea erabaki zuen eta orduz gero politika nahiko autonomoa egin du arlo militarrean. Agintaritzatza militarren sartu behar ote duen eztabaidak «garrantzia galdu

du gaurko testuingurua dela medio» argitu zuen Musitellik.

Alemaniarekin batera, Mendebal Europako Batasuna (MEB) eta Europako Komunitatearen barnean sortuko litzatekeen Europako Armada bultzatu du Frantziak. Espainiak Armada horretan parte hartzeko asmoa agertu du eta berdin egin dute MEBeko beste herrialde batzuk, baina proiektuak britainiarren oposizioa jaso du. Abenduan Maastricht-en (Holanda) EKko Estatu eta Gobernu buruek egingo duten gailurrean eztabaidatuko den gaia izango da.


Gizarte Segurantzak ez ditu sendagai guztiak finantzatzeko

MADRIL

Espainiako Gizarte Segurantzak ez ditu aurrerantzean sendagai guztiak finantzatzeko, Julian Garcia Valverde Osasun ministroak Senatuan esan zuenez. Merkatuan hamabost urtetik gora daramatzaten sendagaien prezioa liberalizatuko da eta Ministeritzak kalitate hobea duena aukeratu ahal izango du finantzatzeko.

Garcia Valverdek Osasun Ministeritzak aurrera eramango duen politika azaltzeko agertu zen Senatuko osasun batzordean. Sendagaiei emandako laguntzak mugatzeaz gain, Osasun Ministeritzak sendagilearen aukeraketa bultzatzeko neurriak hartuko ditu ministroaren esanetan. 250.000 biztanletik gorako hirietan, Gizarte Segurantzak erabiltzen duten medikua aukeratu ahal izango dute.

Jadanik zenbait lekutan hedaturik dagoen erabiltzaileen txartel indibiduala, hiritar guztiei emango zaie hala eskatzen badute. Txartel indibiduala sendagileei beren zerbitzuak hobeto ordaintzeko erabiltzen da Valverderen esanetan.



J. Garcia Valverde. RODRIGO



Egiagarai, ezkerretara, eta Soltxaga dira Gobernuako ordezkariak.

ROQUE

Autonomien finantzaketa eredu berria eztabaidatzen hasi ziren

MADRIL

Atzo hasi ziren ofizialki Espainiako Autonomien finantzaketa eredu berriari buruzko negoziaketak. Ekonomi eta Administrazio Publikoetarako ministroak eta elkarte autonomikoetako Hazienda eta Ekonomi sailburuak biltzen dituen Politika Fiskal eta Finantziarioaren Batzordea arduratuko da negoziazioez. Batzordearen helburua, 1986tik hona indarrean egon den finantzaketa eredu berritzea edo onartzea da. Azken

finean, alderdi politikoei erabakiko dute autonomiek dirua jasotzeko erabiliko dituzten bideak. Autonomia aberatsenak Katalunia buru dutela, baliabide gehiago nahi dute, beren ardurapeko konpetentzia guztiei aurre egiteko. Kataluniak EAE eta Nafarroak duten Kupo sistema eskatzen du, baina jakinik ez duela lortuko, BEZ eta PFEZaren biltzetaren zatia bere eskutik iragateko presionatzen du. Autonomia pobreek, huts egin duen elkartasunaren irizpidea sendotzea bilatzen dute.



ASTE HONETAKO ARGIA

- ❖ EUSKAL HARROBIA galtzear?
- ❖ HILARIO ARBELAITZ: «Kanpotik ez dugu ezer ekarri behar, bertan duguna hori bezain ona delako»
- ❖ LEHEN urratsak euskal filmeak zinema aretoetara hurbiltzeko
- ❖ MADRILEKO bake konferentzia: arabiar eta juduek ezpatak tente.

BIHARKO PRENTSA GAURTIK